

18 DI MAART: GRANDEMENTE RECORDA Y CELEBRA

Aña pasa 18 di maart nos himno y bandera a worde inaugura oficialmente dilanti un multitud di miles y miles di persona. Esaki tabata e acto mas emocional cu e pueblo a presencia den su historia. E aña aki e ordenansa di nos himno y bandera a keda aproba den parlamento haciendo asina nos himno y bandera oficial. Awor nos tin un himno y bandera oficial cu ta exige respet y honor di nos pueblo y mundo henter.

CELEBRACION DI PROMER AÑA DI EXISTENCIA DI NOS HIMNO Y BANDERA


Gobierno a nombra y instala un comision cu tabata tin como meta, organisa diferente actividadnan pa celebra e gran fecha aki. Ta deseo di B.C. di Aruba cu algun dia e dia aki lo worde celebra como un dia nacional na nos isla. E comision tabata bao presidencia di Sr. Godfried Eman, mientras cu e otro miembronan ta: Tico Kuiperi, E. Jong, Holmo Henriquez, Rhoda Steenhuizen-Frigerio, Betico Croes (consehero) Julio Maduro (vice presidente) Albert Eman, August Croes, Atan Lee, Maybeline Arends-Croes, Rufo Odor, Milo Croes y Cobi Angela.

Na tur schoolnan di Aruba, bandera di Aruba a worde hisa oficialmente, mientras cu nos himno a ser toca y canta door di alumnonan di school. Ta promer biaha despues di hopi aña cu un celebracion oficial a tuma lugar na nos schoolnan local. Hopi mayornan a asisti na e ceremonia oficial aki. Despues gobierno di Aruba a duna tur estudianten un "treat". Tabata un bista impresionante di a mira e bandera di Aruba hisa na diferente lugarnan oficial di Aruba. Tabata un bon idea di gobierno insular di Aruba pa stimula nos hubentud, pa respeta y aprecia nos himno y bandera desde awor.

PARADA DI CELEBRACION, COM- BINA CU UN CEREMONIA OFICIAL DEN WILHELMINA STADION

For di dilanti di oficina principal di gobierno insular na Oranjestad un parada di celebracion cu flambew a sali pa mas o menos 7'or di anochi dia 18 di maart 1977. Miles y miles di persona a tuma parti na e parada aki, cual a worde encabezado pa diputadonan, consehero di gobierno insular di Aruba y miembronan di eilandsraad.

Un grupo grandi bisti cu uniform, representando e bandera di Aruba a es-corta e personanan ariba menciona. Tur



Un bista di celebracion di 18 di Maart 1977 na Colegio San Hose, na Sta. Cruz. Sr. Betico Croes, consehero general di gobierno insular tabata invitado especial.



Un multitud grandi a participa den e marcha di celebracion dia 18 di Maart 1977, organisa pa gobierno insular.

participante na e parada di celebracion tabata carga e bandera di Aruba y flambew. Tabata un bista unico e anochi aki.

CELEBRACION DEN WILHELMINA STADION

Un enorme cantidad di persona cual a representa un mayoria grandi di nos pueblo a yena nos stadion Wilhelmina pa presencia celebracion di prome aña di nos himno y bandera. Tabata un bista hopi colorido, ora e banderanan di Aruba, cualnan a worde carga pa e presentenan, a bay laira.

CEREMONIA OFICIAL

Despues cu e himno di Aruba a worde toca y cu e bandera di Aruba a ser hisa, diferente personanan di nos comunidad a hiba palabra. e.o. Sr. Fifi Eman, diputado Nel Oduber, Sr. Chinto Erasmus, Sr. John Hart, Srta. Daisy Correa y finalmente consehero di gobierno di Aruba, Sr. Betico Croes. Pa clausura e gran dia aki, cu pueblo di Aruba ta orguyoso di dje, a sigui un show musical tipico.

Pueblo di Aruba por mira atras, celebracion di un gran dia, haci na un manera masha especial.